

02-

圓瑛編輯

佛學叢書
大乘起信論講義

釋慧律敬題

中華民國八十一年十一月恭印伍仟本 非賣品

回向發願偈

大乘起信論講義

印經功德殊勝行

著述者：釋圓瑛大師

無邊勝福盡回向

倡印者：釋慧律法師

法界沉溺諸有情

結緣者：岡山念佛蓮友

出資讀誦流通者

流通處：岡山念佛堂

消除業障盡無餘

高雄縣岡山鎮中華路116號

身心輕安無病苦

電話：(〇七) 六二五六〇〇五
六二五七〇〇五

唯願捨報無障礙

流通處：高雄文殊講堂

身在華中佛現前

高雄市民權二路嘉陵街6號

親隨彌陀往生去

電話：(〇七) 三三二二七八三三
三三二二七三五九

無去無來事宛然

祥光彩色製版社

地址：台南市東豐路五十三巷三十一號
電話：(〇六)二三八三六六·二二七二五七三

圓瑛編輯

佛學叢書
大乘起信論講義

釋慧律敬題

大乘起信論講義卷上

四明接待講寺佛教講習所圓瑛弘悟述

大乘起信論○今解此論。直分爲六。甲一略釋論題 二造論菩薩 三翻譯

人時 四歸敬述意 五正立論體 六總結回向 今初

大者包含之義。乘有運載之功。起則對境發心。信則忍可印定。論乃假立賓主。問答發揮。決擇正理。破除邪見。揀非經律。故以論名。○題中應分通別。上四字別題。別在當部。下一字通題。通於論藏。○題者頭也。如人頭目爲五官之總。觀其頭目。便知此人。爲忠奸賢否。論題亦爾。爲一論之總。略釋宗要。便知此論權實頓漸。○大有三義。曰體相用。夫一心之理。爲諸法所依。卽體大。具足恆沙稱性功德。卽相大。善能出生一切因果。卽用大。乘者以本覺爲所乘。始覺爲能乘。究竟覺爲乘所至處。故下文云。諸佛本所乘故。一切菩薩。皆

乘此法。到如來地故。○大乘之理。卽是一心。小乘不信此理。沉滯化城。外道不信此理。終無實果。凡夫不信此理。永受輪迴。蓋不信者。實非不具而不信也。人人有心。本來等具。良由五陰所覆。二執所障。此理不得現前。迷而不信。故菩薩愍物沉迷。宗百部大乘。特造此論。普令衆生發起信心。○問。何以獨言發起信心。答。大乘之理。雖衆生等具。實衆生同迷。迷則不信。菩薩闡揚此理。能令從聞生解。破迷起信。信此理已。一切道法。任運而生。華嚴經云。信爲道源功德母。長養一切諸善根。信爲行之本。行無信不立。是起信者。急先務焉。○若約七種立題。大乘是所信之理。信爲能信之心。能信乃卽理之心。所信亦卽心之理。能所不二。惟一心法。則單法立題。若乘字就喻爲稱。亦可法喻立題。又按起字。既有所起之信。必有能起之人。義則兼人。亦可文義雙收。具足立題。一略釋論題竟。

馬鳴菩薩造

菩薩名曰馬鳴者。按諸傳記。當有三釋。一菩薩初生時。感羣馬悲鳴不息。二菩薩善能撫琴。以宣法音。羣馬聞已。咸悉悲鳴。三菩薩善能說法。能令馬聞。悲鳴垂淚。七日不食。故立此名。○菩薩。具云菩提薩埵。此翻覺有情。菩提乃大覺。卽所求也。薩埵乃有情。卽所化也。實智悲並運。上求下化之人。此雙約二利說。若單約自利。雖已分證佛覺。尙有情識未盡故。若單約利他。廣行善巧方便。覺悟一切有情故。○造者製作。宗百部大乘廣義。製作斯論。以約該博。應機施化也。考造論之時。依摩訶摩耶經云。如來滅後六百歲已。九十六種外道等。邪見競興。毀滅佛法。有一比丘。名曰馬鳴。善說法要。降伏一切諸外道輩。此菩薩乃如來預記之人。實內祕外現之士。造論乃在如來滅後。六百餘年。二造論菩薩竟。

甲 三翻譯人時

真諦三藏譯

梵語波羅末陀。華言真諦。契悟真如諦理。闡揚大乘奧義。西印度優禪尼國。人性天高朗。氣宇澄明。風神超拔。博覽羣藏。而於大乘。偏洞深遠。遊歷諸國。隨機利見。於梁武帝太清二年入華。與瞿曇及多侍從。并送蘇合佛像來朝。至未經旬。便值侯景侵擾。迨承聖三年九月十日。與慧顯智愷曇振慧旻等。并黃鉞大將軍太保蕭公勃。於衡州建興寺所譯。沙門智愷筆受。月婆首那等譯語。并翻論旨。玄文二十卷。馬鳴冲旨。更曜於時。邪見之流。伏從正化。○本論前後二譯。一于闐國沙門實義難陀。此云喜學。大周聖歷三年十月八日。於東都佛授記寺譯。沙門復禮筆受。今行前譯。三翻譯人時竟。

甲四歸敬述意二乙先歸敬三寶。後述造論意。歸命盡十方。最勝業徧知。色無礙自在。救世大悲者。及彼身體相。法性真如海。無量功德藏。如實修行等。

將造斯論。先歸三寶。具有三意。一爲荷恩故。若無佛說。法無由起。若無有法。解無從生。若無僧傳。聞無所自。由荷三恩。方成慧悟。今傳此法。理宜致敬。二求加被故。濁惡世中。傳化不易。若不仰請三寶。威力加被。難以自利利人。故應致敬。三令生信故。如率已造論。恐人不信。要歸三寶。法有所宗。庶使論義。印契佛心。易啟信從。故應致敬。○歸命。表能歸之心。盡十方。卽所歸分際。最勝下七句。舉三寶德。歸命有二釋。一歸向義。命謂命根。乃六根之總。一身之要。萬生所重。莫此爲先。今舉之以奉三尊。表信敬之極也。二還源義。衆生六根。從一心起。而背本逐末。奔馳六塵。今舉命則總攝諸根。還歸其本源一心。一心卽自性三寶也。○盡十方。卽極盡十方法界之分量。所有帝網刹中之無盡三寶也。○最勝業徧知三句。歸佛寶也。佛以三輪應物業。卽身口意三輪業用。皆最殊勝。顯非應化身。乃從法垂報之身。不云法身者。以法身入法寶攝故。徧知。意業最勝也。凡夫妄知。外道邪知。二乘徧知。菩薩分知。唯佛徧

知。以眞智證理。理無不徹。以俗智鑒機。機無不宜。乃至緣起差別等。無不盡知。故云徧知也。○色無礙自在。身業最勝也。如來色身自在無礙。乃有多端。今略辨四種。一大小無礙。一一根皆徧法界。而不壞諸根之性。又不雜諸根之相。二互用無礙。一根能作諸根用。諸根能作一根用。自在相作。而不相礙。三理事無礙。現色炳然而不礙舉體性空。妙理湛然而不礙業用無方。下文云。色卽智。說名智身等。四應機無礙。一身不分而普現。多機齊應而無乖。在彼不礙此。在此不礙彼。故云色無礙自在。○救世大悲。口業最勝也。世謂世間。乃三種世間中之有情世間也。卽所救之機。大悲爲能救之心。揀非生緣悲。法緣悲。由無緣大悲內熏。說法度生。因衆生根性不一。故如來巧說不同。大小頓漸。徧圓顯密。無非隨機利導。對症施方。佛說一切法。一一皆從大悲心中流出。故曰救世大悲。○者字指人。卽上三輪最勝之佛。佛德無量。難以盡舉。略舉三業。以表所歸也。○及彼身體相三句。歸敬法寶也。及者併及。言

不但歸佛。亦歸於法也。法寶有四。謂教理行果。今但歸果理。彼卽指佛。約彼佛身。而明法寶。是果法也。又約身之體相。是理法也。及之云者。顯佛與法。是非一義。彼身體相。顯佛與法。是非異義。法卽佛之體相。佛之體相卽法。諸佛以法爲身。體相二大屬法寶攝。用大卽前三輪不思議業用。以用大全依體相。故云及彼身體相也。○法性真如海。此句釋上體字。謂真如法性。卽法身真體。又不特與佛爲體。亦通與一切法爲性。論云。在衆生數中。名爲佛性。在非衆生數中。名爲法性。法性卽諸法實性。真如者。無遣曰真。無立曰如。下文云。此真如體。無有可遣。以一切法悉皆真故。亦無可立。以一切法皆同如故。當知一切法。不可說。不可念。名爲真如。又真則不變。如則不異。恆隨染淨之緣。徧與染淨諸法爲性。雖隨緣而不變。雖不變恆隨緣。故喻如海。因風起諸浪。濕性無有變。無變之性。不礙浪起。又真如具德如海。華嚴云。譬如深大海。珍寶不可盡。於中悉顯現。衆生之形類。甚深因緣海。功德寶無盡。清淨法身

中無像而不現。若按後義兼通體相。○無量功德藏。此句釋上相字。謂此法身。如來藏妙真如性中。含攝具足。無量稱性功德。故云藏。四種法中。此屬教行二法。教含所詮功德。行攝所成功德。功德不一。故云無量。○如實修行等一句。歸敬僧寶也。僧通凡聖。聖有大小。如實修行者。地上大菩薩僧也。稱真實理。起圓頓行。凡所修爲。名如實修行。下文云。依法力熏習。是地前行。如實修行。是地上行。滿足方便。是地滿位。等者。舉中等取前後也。又寶性論。就地。上菩薩說二修行。一如實修行。了如理一味。屬正體智。二徧修行。備知一心。有恆沙法界。屬後得智。此中舉正體智。等取後得智。故云等也。先歸敬三寶竟。

乙 後述造論意

爲欲令衆生。除疑捨邪執。起大乘正信。佛種不斷故。
述意不出二種。一爲利益衆生。二爲不斷佛種。所爲衆生雖多。三聚可以統

收。下文云。爲未入正定衆生。修行信心等。此正爲不定聚。令起正信。兼爲邪定聚。作遠因緣。已入正定聚。具增妙行。○第二句。令得離過益。衆生所以長淪生死。不證涅槃。皆由疑執。以爲其本。由疑故迷真。失於樂也。由執故起妄。種於苦也。○求大乘者。所疑大端有二。一疑法。障於發心。二疑門。障於修行。一疑法者。疑大乘法體。爲一爲多。若一則無異法。生佛平等。何必發宏誓願度生。若多則非一體。物我各別。如何得起同體大悲。由是疑惑。不能發心。二疑門者。疑如來教門無量。爲依何門修行。若要俱依。不能頓入。若依一二。何遣何就。由是疑惑。不能修行。○今爲遣此二疑。立一心法。開二種門。立一心法。遣初疑。明大乘法。唯有一心。一心之外。更無別法。因有無明。迷本一心。起諸波浪。流轉六道。雖起六道之浪。不出一心之海。良由一心動作六道。故得發宏濟之願。六道不出一心。故得起同體大悲。如是遣疑。得發大心。開二種門。遣次疑。明諸教門雖多。初入修行。不出二門。依真如門。修止行。依生滅門。

起觀行。止觀雙運。萬行斯備。入此二門。諸門洞達。如是遣疑。能起修行。○邪執亦二。卽我法二執。眞如界內。不立一塵。本來無我。衆生妄執爲我。本來無法。衆生妄執有法。由有二執。故障人法二空眞理。第五因緣。善護其心。遠離癡慢。出邪網故。正遣此執。綜上除疑。令悟眞樂。捨執令離苦因。俱屬離過益。○起大乘正信句。令得成行益。旣於眞不疑。於妄不執。方得於大乘根本法中。發起正信。亦卽翻前疑字。故云信。翻前邪字。故云正。下文分別發趣道相。及修行信心分。皆成此行也。○佛種不斷故者。意之所歸也。令衆生離過成行。信心滿足。得入初住。證位不退。生如來家。爲法王子。能紹佛位。故云佛種不斷。卽下文信成就發心者。畢竟不退。入如來種中。正因相應等。○又種因也。由此所說。令諸衆生。修行佛因。常不斷絕。如華嚴經云。下佛種子。於衆生田。生正覺芽。是故能令佛寶不斷。此之謂也。故字。與偈首爲字相照應。造論卽所爲二意故。此外無他。四歸敬述意竟。

甲五正立論體三乙初顯益起說二舉數標章三依章別解

論曰。有法能起摩訶衍信根。是故應說。
論曰。揀異經律之辭。有法一句。顯所說義。有大勝益。是故一句。指能詮教。殊
難緘默。有法。卽論所依宗本。謂一心法。具二門三大義故。正示所宗。乃所說
法體。摩訶衍。此云大乘。所宗心法。卽是大乘。能信此心。卽是信根。信心真如
門。正理決定。信心生滅門。業用不亡。二門不出一心。一心具足三大。信而言
根者。謂信滿入住。得位不退。根有二義。一能持義。自分不失。二生長義。勝進
上求。是故二字。如是勝益。皆以有法之功能。爲能起故。則說不容緩也。故曰
應說。論題依此而立。初顯益起說竟。

乙二舉數標章

說有五分。云何爲五。一者因緣分。二者立義分。三者解釋分。四者修行信心分。
五者勸修利益分。

正有五分者。舉章數也。云何下標章名。分者。章段各別。分齊分明。五分輾轉相因。一法不孤起。應機施化。製必有由。二由致既彰。宜標綱要。令識所宗。三宗要幽深。自應廣釋。令物生解。四雖解法義。非行莫階。自必解行相應。五正行既立。鈍根懈慢。自必舉益勸修。此五論之章段。如經之三分。一因緣卽序分。中三段合爲正宗分。後勸修卽流通分。二舉數標章竟。

乙三依章別解卽爲五丙一因緣分二丁一牒章名二顯因緣

初說因緣分。牒章名可知。

丁二顯因緣二戊一問答直顯二問答遣疑

問曰。有何因緣。而造此論。答曰。是因緣有八種。云何爲八。一者。因緣總相。所謂爲令衆生離一切苦。得究竟樂。非求世間名利恭敬故。

此初番問答。答中先舉數。次辨相。後總結。辨相中。初一是總。餘七爲別。總有二義。一菩薩所修諸行。均爲衆生與樂拔苦。不獨在於造論一端。二此一因

緣。乃與一論作發起之由。衆生指凡外權小。以凡夫外道。迷此一心。以招界內。苦苦壞苦行苦。分段生死之果。小乘權教。迷此一心。未離界外微苦。變易生死之報。今開示此心。欲令衆生。信解修行。得證究竟菩提覺法之樂。究竟涅槃寂滅之樂。非欲令其求於後世人天利樂等故。末句。若約菩薩自說。我爲益生。故造斯論。非求己身。名利恭敬也。

二者。爲欲解釋如來根本之義。令諸衆生正解不謬故。

別中有七。各別發起下文。此與立義分。及解釋分三段之中。顯示正義對治邪執二段。作發起因緣。彼文云。依一心法。有二種門。是二種門。各皆總攝一切法。當知一切法。不出二門。二門不離一心。一心卽如來所說。一切法根本之義。以一心無法不攝故也。○又此具本始二覺。本覺真理名如。始覺實智名來。衆生未起始覺無分別智。是如而無來。今依此一心本覺之理。而起始覺之智。還契本覺之理。本始合一。究竟成佛。名曰如來。是一心卽如來。如來